

Isumaginninnermi perorsaasussanik ilinniartitsineq pillugu Inatsisartut peqqussutaat

Inuutissarsiutinik ilinniartitsisarnermik Kalaallit Nunaannut inatsimmi nr. 582-imi, 29. november 1978-imeersumi § 1 malillugu aalajangersarneqarpoq:

Kapitali 1.

Ilinniartitaanerup siunertaa.

§ 1. Isumaginninnermi perorsaasussanik ilinniartitsinerup isumaginninnermi perorsaasunik isumaginninnermi perorsaasunik suliaqarfusuni tamani sulisinnaanngortitsinissaq, kiisalu isumaginninnermi perorsaasut suliaasaqarfiup taassuma iluani ineriartortitsinermut uummaarissumik peqataanissaannut tunngavissaliinissaq siunertaraa.

Imm. 2. Ilinniagaqartut atuagarsornermik sulinermillu misiliisarnermik parlagaattunik ingerlatsinermikkut makkuninnga pisinnaasaqalersinneqarnerisigut anguniagaq anguneqassaaq:

- 1) paasisimasaqarnermik, taamaalillutik perorsaasinnermi ajornartorsiutinik, saqqummeriaatsinik taakkulu kingunerisartagaannik erseqqissunik ataatsimut isiginnillutik paasinnissinnaalerlutik, isumaginninnermi perorsaasinnermi ajornartorsiutit tamakku aaqqiivigisinnaalernissaat siunertaralugu,
- 2) atuagarsornikkut ilisimasaqarnermik sulinnikkulu pisinnaasaqalernermik, taamaalillutik ataatsimut isiginnillutik paasinnissinnaalernertik atorlugu isumaginninnermi kiisalu perorsaasinnermi ajornartorsiutinik pinaveersaartitsinnaalersillugit suliarinnissinnaalersillugillu.

Imm. 3. Isumaginninnermi perorsaasussanik ilinniartitsinerup ilinniagaqarnermi tamatigoortunik avatangiiseqartitsinikkut ilinniagaqartut tapersersorlugillu inuttut ineriartorneranni nukittorsassavai.

Kapitali 2.

Ilinniartitaanerup aqunneqarnera.

§ 2. Isumaginninnermi perorsaasussanik ilinniartitsineq Perorsaasinnermut Ilinniarfimmit ingerlanneqassaaq.

§ 3. Perorsaasinnermut Ilinniarfik rektorimit Naalakkersuisunit atorfinitsinneqartumit aqunneqassaaq.

Imm. 2. Rektorip inassuteqarneratigut ilinniartitsisut pisariaqartinneqartut Naalakkersuisut atorfinitsittassavaat.

§ 4. Ilinniartitaanerup siunnersuisoqatigiit "Isumaginninnermi Perorsaasussanik Ilinniartitaanerup Siunnersuisoqatigiit" Naalakkersuisut pilersissavaat, taakkulu tassaassallutik inuit perorsaasinnermik paasisimasaqartut aamma isumaginninnermi perorsaasussanik ilinniartitsinerup tunngasunik ilisimasallit.

Imm. 2. Ilinniartitaanerup Siunnersuisoqatigiit pissutsit isumaginninnermi perorsaasussanik ilinniartitsinerup tunngasut pillugit Naalakkersuisunit siunnersuineq suliaasaat, matumani makku

pillugit Naalakkersuisunut inassuteqartarneq ilanngullugu:

- 1) ilinniartunngortussanik tiguisarnermut ataatsimiititaliamik pilersitsinissaq
- 2) ilinniartussatut tiguneqarnissamut misilitsinnermi piumasaqaatit
- 3) suliffinnik misiliinnermi suliffiit atorneqartussat akuerineqartarnerat.

Imm. 3. Ilinniartitaanermut Siunnersuisoqatigiit pissutsit makku pillugit aalajangiinernut naammagittaalliuuteqartarfiupput:

- 1) ilinniagaqartunik soraarsitsineq, tak. § 21, imm. 2
- 2) ilinniagaqarnermik nangitsineq, tak. 20, imm. 3
- 3) semesterimut tullermut ingerlaqqinneq, tak. § 14, imm.3
- 4) semesterimit ingerlatamit semesterip tullianut ingerlaqqinngitsoornermut periarfissaq, tak. § 14, imm. 3.

Imm. 4. Siunnersuisoqatigiit katitigaaneraat, oqartussaaffii suliasaallu pillugit malittarisassat erseqqinnerusut Naalakkersuisut aalajangersassavaat.

§ 5. Perorsaanermut Ilinniarfiup aquneqarnera pillugu malittarisassat erseqqinnerusut Naalakkersuisut aalajangersarsinnaavaat.

§ 6. Perorsaanermut Ilinniarfimmi atuarneq akeqanngilaq. Taamaattorli atuartsinernut kapitali 8 tunngavigalugu ingerlanneqartunut Perorsaanermut Ilinniarfik akiliuteqartitsisinnaavoq.

Kapitali 3.

Ilinniartussatut tiguneqarneq.

§ 7. Isumaginninnermi perorsaasussatut ilinniartitsinnermi ilinniartussatut tiguneqarnissami piumasaqaataavoq qinnuteqaateqartoq ilinniartitaanerup aallartinneqarnerani:

- 1) 20-nik ukioqalereersimassasoq,
- 2) ilinniarnertuunngorniatut ilinniarnermi taassumaluunniit assigissaanik ilinniarnermi angusisimassasoq, aamma
- 3) sivikinnerpaamik ukiumi ataatsimi inuussutissarsiornermik misilittagaqassasoq ilinnialikkamut attuumassuteqartumik.

Imm. 2. Taamaattorli qinnuteqaateqartut allamik ilinniagaqarsimasut ilinniartussatut tiguneqarsinnaapput:

- 1) imm. 1-imi nr. 1 aamma 3-piumasaqaatit eqqortinneqarsimappata,
- 2) qinnuteqartoq ilinniartussatut tiguneqarnissaminut misilitsinnermini angusisimappat, aamma
- 3) ilinniagaq pineqartoq atuagarsornikkut isumaginninnermi perorsaanermut attuumassuteqartunik imaqarsimappat.

§ 8. Ilinniartussatut tiguneqarnissamut misilitsinnerit § 7, imm. 2-mi pineqartut rektorip ingerlatissavai.

Imm. 2. Ilinniartussatut tiguneqarnissamut misilitsinnermut malittarisassat Naalakkersuisut aalajangersarsinnaavaat, matumani ilinniartussanik tiguisarneq pillugu ataatsimiititaliamik pilersitsineq ilanngullugu.

§ 9. Ilinniartussatut tiguneqarneq ukiumi pineqartumi ilinniarnernup aallartinneranit pisarpoq. Taamaattorli pissutsit immikkut ittut tamanna ajornartinnigippassuk tamatuma saneqqunneqarnissaa Naalakkersuisut akuerisinnaavaat.

Kapitali 4.

Ilinniartitaanerup sivilissusia imarisaalu.

§ 10. Isumaginninnermi perorsaasussatut ilinniartitsineq ukiunik 3½-inik sivilissuseqartinneqassaaq, semesterinilu imminnut ataannartunik arfineq marlunnik immikkoortortaqluni.

§ 11. Ilinniartitaanermi sammisaqarfiit, atuartitsissutit pikkorissartitsinerillu makku ilaapput:

1) Perorsaanermi tarnillu pissusiisigut sammisaqarfiit (atuartitsissutit "perorsaaneq", "isumaginninnermi perorsaaneq" aamma "tarnip pissusiinut tunngasut").

2) Atuartitsissutit kultureqarnermut mernguernartunullu tunngasut (atuartitsissutit tusagassiuutitut sullivinnilu tunngasut, "isiginnaartitsineq nipilersornerlu", "pinngortitami asimilu inuuneq" kiisalu "pinnguaatit timersornerlu").

3) Inuiaqatigiinnut isumaginninnermullu tunngasutigut atuartitsissutit, kiisalu atuartitsissutit "attaveqatigiinneq", "aaqqissuussaaneq" aamma "siulersuineq".

4) Ilassutaasumik pinngitsoorani pikkorissarfissat.

5) Qulequttat pikkorissarnerillu nammineq toqqakkat.

Imm. 2. Ilinniartitaanermi immikkut ilinniagaq suliffinnillu misiliinerit aamma ilaapput.

§ 12. Ilinniagaqartunik ilinniarnermut sulianillu misiliinernut siunnersuineq Perorsaanermut Ilinniarfiup isumagissavaa, ilinniartitaanermilu ilinniagaqarnermik aaqqissuussineq suliarissallugu.

Imm. 2. Ilinniagaqartut Perorsaanermut Ilinniarfik oqaaseqaateqartereerlugu ilinniagaqarnermik aaqqissuussinerup sunik imaqarnissaa pillugu malittarisassat Naalakkersuisut aalajangersarsinnaapput.

§ 13. Makku pillugit malittarisassat erseqqinnerusut Naalakkersuisut aalajangersinnaavaat:

1) Ilinniartitaanerup ilaasa § 11-mi taaneqartut siunertaat kiisalu imarisaat annertussusiilu.

2) Ukiup ilinniartitsiviusup sivilissusia agguataarneqarneralu.

Kapitali 5.

Ilinniakkamik ingerlatsineq najuuttussaatitaanerlu.

§ 14. Ilinniagaqartut ilinniarnerminnik ingerlatsinissaminnut ilinniartitaanerullu ilaanut tamanut najuunnissaminnut pissusaaffeqarput.

Imm. 2. Ilinniarnermik ingerlatsinnginneq najuuttussaatitaanermillu unioqqutitsineq semesterip tullianut ingerlaqqissinnaannginneq ilinniagaqartullu semesterimik uteqqiisinnaannginnera kingunerissavai.

Pissutsit immikkut ittut atuutsillugit ilinniagaqartup semesterimik uteqqiinissaa rektorip akuersissutigisnaavaa.

Imm. 3. Semesterip tullianut ingerlaqqinnissamik semesterimillu uteqqiinissamik aalaja-ngiinerit

Ilinniartitaanermut Siunnersuisoqatigiinnut naammagittaalliutigineqarsinnaasussaapput, tak. § 4, imm. 3 aamma 4.

Imm. 4. Ilinniarnermik ingerlatsineq najuuttussaatitaanerlu pillugit malittarisassat erseqqinnerusut Naalakkersuisut aalajangersarsinnaavaat.

Kapitali 6.

Misilitsinnerit, naliliinerit aamma soraarummeersimanermut uppernarsaat.

§ 15. Ilinniarneq misilitsinnertigut naliliinertigullu uppernarsaaserneqartassaaq. Makku eqqortinneqarpata ilinniarneq angusiffiusimassaaq:

1) sulinermik misiliinerit tamarmiut "akuerineqarpoq" atorlugu nalilerneqarlutik inaarneqarpata,

2) ilassutaasumik pinngitsoorani pikkorissarfissat "akuerineqarpoq" atorlugu nalilerneqarlutik inaarneqarpata,

3) immikkut allattariarsorluni ilinniagaq angusiffusimappat, aamma

4) inaarutaasumik misilitsinnerit avataanit naliliisoqarluni ingerlanneqartut angusiffusimappata, tak. § 16, imm. 1.

Imm. 2. Ilinniagaqarnerup angusiffusimaneranut uppersaaitut soraarummeernermit uppersaait tunniunneqassaaq.

Imm. 3. Atuartitsissutit sammisallu makku inaarutaasumik avataanit naliliisoqarluni misilitsiffussapput:

1) Perorsaanermit tarnillu pissusaanut tunngasunik sammisaqarfit.

2) Kultureqarnermit mernguernartunullu tunngasunik sammisaqarfit.

3) Inuiaqatigiit isumaginninnerlu pillugit atuartitsissutit kiisalu atuartitsissutit "attaveqatigiinneq", "aaqqissuussaaneq" aamma "siulersuineq".

Imm. 4. Ilassutaasumik pinngitsoorani pikkorissarfissat, qulequttat pikkorissarnerillu nammineq toqqakkat, sulinermik misiliinerit tamarmik immikkut kiisalu sulinermik misiliinerit ataatsimoortillugit "akuerineqarpoq" imaluunniit "akuerineqanngilaq" atorlugit naliliiffigalugit inaarneqassapput.

Imm. 5. Ilassutaasumik pinngitsoorani pikkorissarnerit imaluunniit sulinermik misiliinerit ataatsimoortillugit "akuerineqarpoq" atorlugu nalilerneqanngippata ilinniagaqartoq semesterip tullianut ingerlaqqissinnaanngilaq. Taamatut pisoqarpat ilinniagaqartup semesteri taanna uteqqissinnaassavaa.

Imm. 6. Avataaneersunik naliliisoqarluni inaarutassumik misilitsinneq ataaseq arlallilluunniit ilinniagaqartup angusiffingikkunigit uku arlaat qinersinnaavaa:

1) nutaamik misilitsinnissamut (misilitseqqinnermut) nalunaarluni, taannalu misilitsinnerup

angusinngitsoorfusup ingerlanneqarneranit siusinnerpaamik qaammat ataaseq qaangiute-reerpat ingerlanneqarsinnaassaaq, aamma

2) semesterit arfineq aappaat uteqqillugu, tamatumalu kingorna misilitseqqinnissaminut ilinniagaqartut allat peqatigalugit nalunaarluni.

Imm. 7. Atuartitsissutini ataasiakkaani, immikkut ilinniakkami kiisalu ilassutaasumik pinngitsoorani pikkorissarfissani, qulequttani pikkorissartitsinnerilu nammineq toqqakkani aamma sulinermik misiliinermi karakteritigut piumasaqaatit Naalakkersuisut aalajangersassavaat.

§ 16. Misilitsinnerit soraarummeersitsisumit ataatsimit arlalinnilluunniit aamma naliliisartumit ataatsimit arlalinnilluunniit Naalakkersuisut toqqagaannit naliliiffigineqartut "avataanit naliliisoqarluni misilitsinnernik" taaneqartarput.

Imm. 2. Misilitsinnerit soraarummeersitsisumit ataatsimit arlalinnilluunniit, imaluunniit ilinniartitaanermi ilinniartitsisumit ataatsimit arlalinnilluunniit Naalakkersuisut toqqagaannit naliliiffigineqartut "nammineq ilinniartitsisorisat naliliisoralugit misilitsinnernik" taaneqartarput.

§ 17. Allattariarsorluni misilitsinnerit Perorsaanermit Ilinniarfimmit nakkutigineqarlutik ingerlanneqassapput. Allattariarsorluni misilitsinnerit tamanut ammasuunngillat.

Imm. 2. Oqaluttariarsorluni misilitsinnerit ilinniartitsisunit atuartitsissummi ilinniartitsisuusimasunit ingerlanneqassapput. Allattariarsorluni misilitsinnerit tamanut ammasuupput.

§ 18. Allattariarsorluni avataanit naliliisoqarluni misilitsinnerni misilitsissutissat ataatsimiititaliamit misilitsissutissanik suliaqartussamit suliarineqassapput, atuartitsissutinullu ataasiakkaanut tamanut immikkut misilitsissutissanik suliaqartussanik Naalakkersuisut ataatsimiititaliamik pilersitsisassapput.

Imm. 2. Ataatsimiititaliat misilitsissutissanik suliaqartussat inuttalersugaanerat, oqartussaaffi sulinerallu pillugit malittarisassat Naalakkersuisut aalajangersassavaat.

§ 19. Perorsaanermut Ilinniartfimmi misilitsinnerit soraarummeernerlu pillugit malittarisassat erseqqinnerusut Naalakkersuisut aalajangersarsinnaavaat, matumani misilitsinnerit siunertaat, misilitsinnerit ingerlanneqarneri, misilitsinnerit ilusaat, naammagittaalliuuteqarnissamut periarfissat, naliliisartut, napparsimanerup kingorna soraarummeerneq kiisalu allattaaviit soraarummeernermullu uppersaait pillugit malittarisassat ilanngullugit eqqarsaatigalugit.

Kapitali 7.

Ilinniagaqarnermik unitsitsineq aamma ilinniagaqarnermit soraarsitaaneq.

§ 20. Ilinniagaqarneq unitsinneqarsimasooq tiguneqarnissamik qinnuteqaateqarnikkut taamaallaat nangeqqinneqarsinnaavoq, tak. kapitali 3.

Imm. 2. Taamaattoqli ilinniagaqarneq unitsikkallarneqarsimasooq pissutsit immikkut ittut tamanna ajornartinngippassuk rektorip akuersissuteqarneratigut nangeqqinneqarsinnaavoq.

Imm. 3. Imm. 2 tunngavigalugu aalajangiinerit Ilinniartitaanermut Siunnersuisoqatigiinnut naammagittaalliuutigineqarsimapput, tak. § 4, imm. 3 nr. 2.

Imm. 4. Ilinniagaqarnerup nangeqqinneqarnissaa pillugu malittarisassat erseqqinnerusut Naalakkersuisut aalajangersarsinnaavaat.

§ 21. Ilinniagaqartoq ilinniartitaanermi soraarsinneqarsinnaasussaavoq:

- 1) ilinniarnermik ingerlatsinissamik piumasaqaat najuuttussaaitaanerlu arlaleriarluni piffissalluunniit sivilisunerup ingerlanerani eqqortissimanngikkunigit,
- 2) ilinniartuup torersuunissamik malittareqqusai annertuumik sumiginnarsimagunigit,
- 3) ataavartumik napparsimanini, nakorsaaitornini malugisimaarniutinilluunniit atuinnermigut taakkuluunniit assigisaasigut allat peqqinnerannik isumannaatsuuneranilluunniit ulorianartorsiortitsiguni, imaluunniit
- 4) ilinniartitaanermi ingerlaqqinnissaminut malunnartunik akerliuunniit iliuuseqarsimaguni taamaluunniit pisoqarneranut pusuusimaguni.

Imm. 2. Ilinniagaqartumik soraarsitsisoqarnissaa rektorip aalajangertassavaa. Tamanna pillugu aalajangiinerit Ilinniartitaanermut Siunnersuisoqatigiinnut naammagittaalliuutigineqarsinnaapput, tak. § 4, imm. 3 nr. 1.

Imm. 3. Ilinniagaqartumik soraarsitsisarneq pillugu malittarisassat erseqqinnerusut Naalakkersuisut aalajangersarsinnaavaat.

Kapitali 8.

Annertunerumik ilinniagaqarneq ilinniaqqittarnerlu.

§ 22. Isumaginninnermi perorsaasut atorfeqalersimasut annertunerumik ilinniagaqartinneqartarnerat ilinniaqqittarnerallu Perorsaanermut Ilinniartimmit isumagineqassaaq. Aammattaaq annertunerumik ilinniagaqarnerit ilinniaqqinnerillu malittarisassat erseqqinnerusut Naalakkersuisunit aalajangersarneqartut malillugit ilinniartinnit allani ingerlanneqarsinnaapput.

Imm. 2. Annertunerumik ilinniartitaanerit aamma ilinniaqqinnerit imarisaat, annertussusii ingerlanerilu, taarteqartitsisarneq aamma annertunerumik ilinniagaqarnerup ilinniaqqinnerullu piffissamut

suliffiusumut ilanngullugu naatsorsorneqartarnerat pillugit malittarisassat erseqqinnerusut Naalakkersuisut aalajangersarsinnaavaat.

§ 23. Sulisut isumaginninnermi perorsaasut suliassa qarfiini suliagartinneqartut ilinniaqqittarnerat pillugu malittarisassat erseqqinnerusut Naalakkersuisut aalajangersarsinnaavaat.

Kapitali 9.

Misiliilluni aaqqissuussinerit.

§ 24. Aaqqissuussinnermik saneqqutsinerit misiliilluni aaqqissuussinernut periarfissiisut Naalakkersuisut akuerisinnaavaat.

Kapitali 10.

Atortuulersitsineq

§ 25. Inatsisartut peqqussutaat manna ilinniagaqartunut ukiumut ilinniagaqarfusumut 1999/2000-imut kingusinnerusumullu ilinniartussatut tiguneqartunut 1. januar 1999-imit atortuulerpoq.

Imm. 2. Tamatumunnga peqatigitillugu meeqqat atuarfianni ilinniartitsisussat ilinniartitaasarnerat isumaginninnermillu suliagartussanik ilinniartitsisarnerit pillugit Inatsisartut peqqussutaat nr. 1 16. maj 1989-imeersoq atorunnaarsinneqarpoq.

Kapitali 11.

Ikaarsaariarnermi aalajangersakkat.

§ 26. Ilinniagaqartut 1. januar 1999 sioqqullugu ilinniartussatut tiguneqarsimasut malittarisassat manna tikillugu atuuttut malillugit ilinniakkatik inaarsassavaat, tak. meeqqat atuarfianni ilinniartitsisussat ilinniartitaasarnerat isumaginninnermillu suliagartussanik ilinniartitsisarnerit pillugit Inatsisartut peqqussutaat nr. 1 16. maj 1989-imeersoq.

Imm. 2. Malittarisassalli atuuttut malillugit ilinniakkamik inaarsaaneq maj/juni 2001-imi soraarummeersitsinerup tungaanut tassanilu taamaallaat pisinnaavoq. Taamaattorli ilinniartitaanermi tassani rektori immikkut akuersissuteqarsinnaavoq, taamaalilluni ilinniakkamik inaarsaaneq kingusinnerusukkut pisinnaalersillugu.

Imm. 3. Meeqqat atuarfianni ilinniartitsisussat ilinniartitaasarnerat isumaginninnermillu suliagartussanik ilinniartitsisarnerit pillugit Inatsisartut peqqussutaat nr. 1 16. maj 1989-imeersoq tunngavigalugu aalajangersakkat aalajangersakkanit Inatsisarsartut peqqussutaat manna inatsisitigut tunngavigalugu aalajangersarneqarsimasunit taarserneqarnissamik atorunnaarsinneqarnissamilluunniit tungaanut atuutiinnassapput.

Namminersornerullutik Oqartussat, ulloq 20/5-1998

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut